



Title	碑文一篇
Author(s)	財津, 桃溪
Citation	懷德. 1932, 10, p. 107-107
Version Type	VoR
URL	<a href="https://hdl.handle.net/11094/88878">https://hdl.handle.net/11094/88878</a>
rights	
Note	

*The University of Osaka Institutional Knowledge Archive : OUKA*

<https://ir.library.osaka-u.ac.jp/>

The University of Osaka

## 贈從五位田中楠之助君碑陰記

君諱祐信。姓田中氏。通稱楠之助。河內大縣郡堅下村法善寺人。父曰兵左衛門。家世農。君生而俊異。喜讀書。通大義。旁精擊劍。時際幕府未造。外舶屢至。要求互市。幕府因循不決。於是尊王攘夷之論起矣。君亦深慨之。廣納交志士。東西奔走。不復顧家事。父兄恐罪及驟止之。不聽。領主大久保公亦忌君所爲。捕下獄。亡幾釋還鄉。會侍從中山忠光倡義天下。徵勤王之士。君即往歸之。文久三年八月四日也。尋隨侍從舉兵大和之五條。軍敗。君逃。竊圖再起。而同志四散不可收拾。遂爲敵兵所獲。械送京都西番所。元治元年七月廿四日處斬。時年二十有二。德川氏之世。天子擁虛器。民知有將軍。而不知有天子。而君乃起身隴畝間。明君臣之義。王霸之別。誓志敵愾之死靡佗。自非忠義純粹之士。安能如此。先是明治三十五年十一月八日。朝廷追錄其功。特贈從五位。今茲秋恭遇即位大典。於是鄉人胥謀。將爲君建碑。一以記念盛儀。一以裨補教化。來徵文於余。余喜其舉。不敢以不文辭。略敘其行實與之。使後世永有所矜式焉。昭和三年十月從五位勳六等財津愛象撰並書